

**I. ATALA****BIZKAIKO LURRALDE HISTORIKOKO FORU ADMINISTRAZIOA****Bizkaiko Foru Aldundia****Euskara eta Kultura Saila**

Bizkaiko Foru Aldundiaren 65/2019 FORU DEKRETUA, maiatzaren 28koa, zeinaren bidez onesten baitira 2019ko ekitaldian Bizkaiko kultura zabaltze aldera egiten diren ikus-entzunezko dokumentalen ekoizteko dirulaguntza foralen oinarriak eta deialdia.

Euskal Autonomia Erkidego Osorako Erakundeen eta Lurralde Historikoetako Foru Erakundeen arteko Harremani buruzko azaroaren 25eko 27/1983 Legeak, 7.a.13) artikuluan, eskumen eksklusiboa ematen die lurralde historikoei, besteak beste lurralde historikoaren interesekoak diren kultura-organismoak sortu eta mantentzeko. Eskumen hori betetzeko, Bizkaiko Foru Aldundiak, bere eskumenen eremuaren barruan, jardute-lerro batzuk dauzka abian kultura-diziplina guztiak bultzatu, sustatu eta hedatzeko.

Bizkaiko Foru Aldundiaren martxoaren 6ko 22/2018 Foru Dekretuak, zeinak Bizkaiko Foru Aldundiko Euskara eta Kultura Sailaren egitura organikoari buruzko erregelamendua onesten duen, sail horri eskumen hau esleitzen dio: Bizkaian kultura sustatu eta zabaltzea, gure kulturaren ezagutza eta garapenetik abiatuta eta beste kultura guztiei atek zabalduz.

Jardute-esparrua horrelaxe dago definituta, eta kontuan hartu behar da zein zeregin betetzen duen ikus-entzunezkoak XXI. mendean zabalkunde sozialeko tresna gisa; horregatik, Bizkaiko Foru Aldundiaren ustez, beharrezkoa da laguntza ematea dokumentalak egiteko, berauen helburua Bizkaiko kultura biztanleriaren sektore gehiagotara zabaltzea delarik, bai memoriarekin lotutako dokumentalak eginaz, bai sorkuntzako adierazpen berriak erabiliz.

Foru-dekretu honek bete egiten ditu erregulazio onaren printzipioak; printzipio horiek Administrazio Publikoen Administrazio Prozedura Erkidearen urriaren 1eko 39/2015 Legean aurrez ikusten dira eta Bizkaiko Foru Aldundiaren urtarrilaren 17ko 2/2017 Foru Dekretuaren 3. artikuluan jasotzen dira (foru-dekretu horren bidez, Bizkaiko Foru Aldundian xedapen orokorrak egiteko prozedura arautzen da).

Foru-dekretu horretan xedatutakoa kontuan hartuta, txosten hauek eman dira foru-dekretu hau egin denean:

1. Proiektua sustatu duen sailaren txosten juridikoa.
2. Generoaren eraginaren aurretiazko ebaluazioari buruzko txostena.
3. Kontrol ekonomikoari buruzko txostena.
4. Legezketasunari buruzko txostena.

Bizkaiko Lurralde Historikoko Foru Erakundeen Hautapen, Antolaketa, Araubide eta Jardunbideari buruzko otsailaren 13ko 3/1987 Foru Arauaren 39.k) artikulua ezartzen du foru-diputatuen eskumena dela, besteak beste, Foru Aldundiari proposamenak aurkeztea haien sailtako gaiei buruzko foru-dekretuen proiektuak onets ditzan. Bestalde, Foru Administrazioak ematen dituen dirulaguntzen araubide juridiko orokorra arautzen duen maiatzaren 31ko 5/2005 Foru Arauaren 16.1 artikulua ahalmena ematen dio Bizkaiko Foru Aldundiari dirulaguntzen ematea arautuko duten oinarriak onesteko. Eta, azkenik, Dirulaguntzen Erregelamendua onesten duen Bizkaiko Foru Aldundiaren martxoaren 23ko 34/2010 Foru Dekretuaren 41.1 artikulua aukera ematen du dirulaguntzen oinarri arautzaileak eta deialdia batera izapidetzeko, eta ezartzen du Gobernu Kontseiluari dagokiola onestea egintza bakarrean.

Hori dela bide, Euskara eta Kultura Saileko foru-diputatuaren ekimenez, eta aurrez Bizkaiko Foru Aldundiak 2019ko maiatzaren 28ko bileran eztabaidatu ondoren, honako hau,



XEDATZEN DUT:

Artikulu Bakarra.—Foru Aldundiaren dirulaguntza batzuen oinarriak eta deialdi publikoa onestea

Onetsi egiten dira, 2019ko ekitaldian Bizkaiko kultura zabaltze aldera egiten diren ikus-entzunezko dokumentalen ekoizpena egiteko Euskara eta Kultura Foru Sailak emango dituen dirulaguntza foralen oinarriak eta deialdia.

I. TITULUA

XEDAPEN OROKORRAK**1. oinarria.—Dirulaguntzaren xedea**

1. Foru-dekretu honen arabera diruz lagundu daitezkeen jarduera hauxe da: ikus-entzunezko dokumentalak ekoiztea, baldin eta dokumentalok Bizkaiko kultura balioesten badute eta jendaurrean 2020ko apirilaren 1a baino lehen zabaltzen badira.

Dirulaguntzaren eskabidean aurkeztutako proiektuak 2019ko ekitaldian zehar ekoitzi beharko dira.

2. Foru-dekretu honen aplikazio-eremutik kanpo geratzen dira honako hauek:
 - a) Hezkuntza-sistemako ikaskuntza-prozesuei lotutako dokumentalak.
 - b) Hizkuntzak ikasteko egiten diren dokumentalak.
 - c) Turismoa sustatzeko egiten diren dokumentalak.
 - d) Fikzio-dokumentalak.
 - e) 30 minutukoak baino laburragoak eta 90 minutukoak baino luzeagoak diren dokumentalak.
 - f) 2019ko urtarrilaren 1a baino lehen estreinatutako dokumentalak.
 - g) Kirol-gaiei buruzko dokumentalak.
 - h) Sexuarengatik diskriminazioa dakarten dokumentalak.
3. Diruz lagunduko dira 2019an egindako ekoizpen-gastuak bakar-bakarrik.

Betiere, diruz lagundu daitezkeen gastutzat joko dira batere zalantzarik gabe lagundutako jardueraren izaerarekin bat datozenak, guztiz beharrezkoak direnak eta ezarritako epearen barruan egiten direnak, baina diruz lagundu daitezkeen gastuen eskuraketa-kostua ezin da inola ere izan merkatuko balioa baino handiagoa.

Diruz lagundu daitezkeen gastutzat bakarrik onartuko dira transakzio ekonomiko bat eragin dutenak bakarrik; transakzio hori egiaztatuko da zelan eta dirulaguntza eskatu duen erakundearen izenean egindako fakturen bidez.

Honako hauek, berriz, ez dira diruz lagundu daitezkeen gastuak:

- a) Zabalkunde-gastuak.
- b) Dirulaguntzaren eskatzailea ez den beste erakunde batek zuzenean ordaindutako gastuak.
- c) Gauzatan ordaindutako babesa.
- d) Eskatzailearen egitura kudeatzeko gastuak (egitura: langileak, lokalak mantentzea, egitura funtzionala mantentzea), baldin eta gastu horiek gainditzen badute proiektuaren gastuen zenbateko osoaren %10.
- e) Ekipo-ondasunak eskuratzea, baldin eta haien amortizazioa luzeagoa bada foru-dekretu honetan jasotzen diren jarduerak egiteko epea baino.
- f) Banku-kontuetako interes zordunak.
- g) Interesak, errekaruak eta administrazio-zehapenak eta zehapen penalak.
- h) Prozedura judizialen gastuak.
- i) BEZa, baldin eta berreskura edo konpentsa badaiteke. Kasu horretan, BEZik gabe agertu behar dute gastuen zenbatekoek, hala eskabidean agertzen den



aurrekontuan, nola dirulaguntzaren justifikazioarekin batera aurkeztuko den aurrekontu exekutatuan.

- j) Oro har, maiatzaren 5/2005 Foru Arauaren 29. artikularekin bat etorrira, beren-beregi kanpo utzitakoak.

4. Foru-dekretu honen helburua erakunde eskatzaileen ekintzak lagundu eta osatzea da; horregatik ez dira inoiz finantzatuko jardueren ondoriozko gastu guztiak.

2. oinarria. — *Pertsona eta erakunde onuradunak*

1. Foru-dekretu honetan araututako dirulaguntzak honako hauek jaso ditzakete: sozietate anonimoek, erantzukizun mugatuko sozietateek, sozietate kooperatiboek eta sozietate zibilek (Kode Zibilaren 1669. artikulukoak izan ezik) eta enpresa-jarduerak egiten dituzten pertsona fisikoek, baldin eta maiatzaren 31ko 5/2005 Foru Arauaren 12. artikuluan jasotako egoeretako batean ez badaude eta baldintza hauek betetzen badituzte:

- a) Egoitza soziala Bizkaiko Lurralde Historikoan izatea.
- b) Xede soziala ikus-entzunezko ekoizpena izatea.
- c) Alta emanda egotea EJZearen dagokion epigrafean: 196110.
- d) Dagokion erregistroan inskribatuta egotea (sozietate zibil eta pertsona fisikoen kasuan izan ezik).

2. Foru-dekretu honen bidez araututako deialditik kanpo geratuko dira pertsona hauek:

- a) Ondasun-erkidegoak eta Kode Zibilaren 1669. artikuluan aipatutako sozietate zibilak.
- b) Emakumeen eta Gizonen Berdintasunerako 4/2005 Legearen III. tituluaren, Emakumeen eta Gizonen Berdintasun Eragingarrirako martxoaren 22ko 3/2007 Lege Organikoan edo Emakumeen eta Gizonen Berdintasunerako ekainaren 20ko 4/2018 Foru Arauan ezarritako betebeharrak betetzen ez dituztenak.

II. TITULUA

ARAUBIDE JURIDIKOA

3. oinarria. — *Aplikatu beharreko araudia*

1. Foru-dekretu honetan jasota ez dagoenerako, honako hauek ezarriko dira: Foru Administrazioak ematen dituen dirulaguntzen araubide juridiko orokorra arautzen duen maiatzaren 31ko 5/2005 Foru Araua, martxoaren 23ko 34/2010 Foru Dekretuaren bidez onetsitako Dirulaguntzen Erregelamendua, eta, haien guztien osagarri moduan, Administrazioen Publikoen Administrazio Prozedura Erkidearen urriaren 1eko 39/2015 Legea, Sektore Publikoaren Araubide Juridikoaren urriaren 1eko 40/2015 Legea eta beste edozein xedapen arauemaile, berak duen izaeragatik ezartzeko modukoa baldin bada.

2. Bizkaiko Gardentasunari buruzko otsailaren 17ko 1/2016 Foru Araua erakunde pribatu hauei aplikatuko zaie: aurrekontu-ekitaldian zehar Bizkaiko Foru Aldundiaren 100.000 euroren edo gehiagoren laguntzak edo dirulaguntzak jasotzen dituztenei edo haien urteko diru-sarreraren %40 Aldundiaren laguntzetatik edo dirulaguntzetatik badator, betiere gutxienez 5.000 euro badira.

4. oinarria. — *Arau-hausteak eta zehapenak*

Arau-hauste eta zehapenei dagokienez, Foru Administrazioak ematen dituen dirulaguntzen araubide juridiko orokorra arautzen duen maiatzaren 31ko 5/2005 Foru Arauaren IV. tituluaren xedatutakoa ezarriko da, bai eta arau hori garatzen duen erregelamenduen IV. titulu ere.

**III. TITULUA**
PROZEDURA**5. oinarria. — Eskabideak aurkezteko lekua eta epea**

1. Administrazio Publikoen Administrazio Prozedura Erkidearen urriaren 1eko 39/2015 Legearen 14. artikulua 2. eta 3. zenbakietan xedatutakoarekin bat, foru-dekretu honetan arautzen diren dirulaguntzen eskatzaileak behartuta daude Bizkaiko Foru Aldundiarekin harremanak bitarteko elektronikoen bidez izatera.

Pertsona edo erakunde eskatzaile bakoitzak proiektu bakar bat baino ezin izango du aurkeztu.

2. Eskabideak aurkezteko, hilabeteko (1) epea dago, foru-dekretu hau Bizkaiko Aldizkari Ofizialean argitaratu eta hurrengo egunetik aurrera zenbatzen hasita.

6. oinarria. — Eskabidearekin batera aurkeztu behar diren agiriak

1. Dirulaguntzaren eskabide espezifikoak Bizkaiko Foru Aldundiaren egoitza elektronikoa egongo dira eskuragarri (<https://www.ebizkaia.eus/es/inicio>), eta bertan bete eta aurkeztu beharko dira, 39/2015 Legearen 66.6 artikuluan ezarritakoarekin bat.

2. Dokumentazio orokor eta espezifiko hau erantsi beharko da:

- a) Pertsona fisikoren batek entitate baten izenean aurkeztu baldin badu eskaera bere NAN elektronikoen bidez, hauek ere ekarri beharko ditu: entitate horren IFZaren kopia, eta ahalordetze-eskirituraren fotokopia edo entitate horren izenean aritzeko halako ordezkari egiaztatzen duen bestelako dokumenturik.
- b) Erakundearen estatutuen kopia edo erakundea eratuta dagoela egiaztatzen duen dokumentazioa; batean zein bestean erakundearen helbideak eta xede sozialak agertu behar dute, baldin eta erakunde horiek sortu berriak badira, azken hiru urteetan aldaketak izan badituzte, edo Kultur Ekintzako Zerbitzuan aurretik dirulaguntzarako eskabiderik aurkeztu ez badute.
- c) Dagokien erregistroan inskribatuta daudela ziurtatzen duen agiria (sozietate zibilen eta pertsona fisikoen kasuan izan ezik).
- d) Banku-helbideratzearen fitxa, behar bezala beteta, alta edo aldaketaren bat egon bada, bakarrik.
- e) Proiektuaren azalpena, gutxienez honako alderdi hauek jasoko dituena:
 - 1) Azalpen-memoria.
 - 2) Dokumentalaren gidioa.
 - 3) Dokumentala ekoizteko plana.
 - 4) Dokumentalaren fitxa tekniko eta artistikoa.
- f) Erakundearen kasuan, erakundearen zuzendaritza- eta gobernu-organoko kideen kopurua jasotzen duen txostena; sexuaren arabera bereizi behar dira kideak, eta bereziki adierazi behar da emakumezkoa ala gizonezkoa den erakundeko burua. Zuzendaritza- eta gobernu-organoko idazkariak edo idazkari-lanetan diharduenak sinatuko du txostena.

3. Bizkaiko Foru Aldundiak eskabidea sinatu duen pertsonaren nortasun-datuak egiaztatuko ditu, bai eta EJZren zer epigrafetan dagoen alta emanda; betiere eskatzaileek berriaz uko egiten ez badiote horri.

Halaber, Bizkaiko Foru Aldundiak eskatzailearen banku-kontuaren titulartasun-datuak egiaztatuko ditu, betiere eskatzaileek berriaz uko egiten ez badiote horri.

Datu horiek eskuratzeko modua bat etorriko da Datu pertsonalen tratamenduari eta datu horien zirkulazio askeari dagokienez pertsona fisikoak babesteari buruzko Europako Parlamentuaren eta Kontseiluaren 2016ko apirilaren 27ko 2016/679 Erregelamenduan (EB) eta erregelamendu hori garatzen duen araudian ezarritakoarekin bat, bai eta Datu pertsonalak babestu eta eskubide digitalak bermatzeko abenduaren 5eko 3/2018 Lege Organikoan ezarritakoarekin bat etorritik.



4. Era berean, eskabide hau sinatuta baimena ematen zaio Bizkaiko Foru Aldundiko Euskara eta Kulturako Foru Sailari Ogasunaren eta Gizarte Segurantzaren ziurtagiriak eskatzeko, Dirulaguntzei buruzko maiatzaren 31ko 5/2005 Foru Arauaren 21.3 artikuluan ezarritako ondorioetarako.

5. Bizkaiko Gardentasunari buruzko otsailaren 17ko 1/2016 Foru Arauaren 2. artikulua aintzat harturik, adierazi beharko da zein diren erakundeak urtean aurreikusten dituen diru-sarrera guztiak.

7. oinarria. – Eskabideak zuzentzea edo hobetzea

1. Eskabideak behar bezala beteta ez badaude, edo eskabidearekin batera foru-dekretu honetan eskatutako agirietakoren bat aurkeztu ez bada, errekerimendu elektronikoa egingo zaio erakunde eskatzaileari, hamar (10) egun balioduneko epearen barruan akatsa zuzendu dezan edo beharrezko agiriak aurkez ditzan. Era berean, ohartaraziko zaio ezen, hala egiten ez badu, eskaeran atzera egin duela ulertuko dela eta, behin ebazpena emanda, eskaera artxibatu egingo dela.

2. Edonola ere, Kultur Ekintzako Zerbitzuak beharrezkotzat jotzen duen informazio osagarri guztia eskatu ahal izango du, aurkezten diren eskabideak behar bezala ulertzeko eta ebaluatzeko.

8. oinarria. – Dirulaguntzak emateko araubidea

Dirulaguntzak norgehiagoka sistemaren bidez emango dira, hau da, aurkeztutako eskabideak erkatuko dira, eta, foru-dekretu honen 9. oinarrian ezarritako ebaluazio-irizpideak kontuan hartuta, aurkeztutako eskabideen arteko lehentasun-hurrenkera ezarriko da.

9. oinarria. – Dirulaguntzak ebaluatzeko irizpideak.

1. Dirulaguntzetarako eskabideei buruzko ebazpen-proposamena egiteko eta haien zenbatekoa zehazteko, epaimahai kalifikatzaileak ondorengo irizpideak eta haien haztapena hartuko ditu kontuan. Gehienez, 100 puntu emango dira, honela banatuta:

a)

Proiektuaren interes kulturala. Gehienez, 60 puntu emango dira, honela banatuta:

- 1) Zabaldu nahi den kultura-adierazpena: gehienez, 30 puntu.
- 2) Gidoiaren kalitatea: gehienez, 15 puntu.
- 3) Proiektua egitean ageri den sormena: gehienez, 15 puntu.

b) *Andrazkoek proiektuan duten partaidetza.* Gehienez, 10 puntu emango dira, honela banatuta:

Puntu bat andrazko bakoitzak proiektuaren jarduera hauetan parte hartzeagatik: gidoigintza, zuzendaritza, argazkigintza, ekoizpena, musika.

c) *Proiektuaren autofinantzaketa maila; horrelakotzat hartuko da hurrengo eragiketaren emaitza:* proiektuaren diru-sarrera propioak gehi eskatzailearen ekarpen propioa zati aurrekontuko diru-sarreraren zenbateko osoa. Gehienez 15 puntu emango dira.

Puntuazioa honela kalkulatu da: autofinantzaketa-maila handiena duen proiektuari 15 puntu emango zaizkio, eta, ondoren, hiruko erregela erabiliko da puntuak banatzeko.

Lortutako puntuazioan zenbaki hamartarrak egonez gero, zenbaki oso hurbilenera biribilduko da puntuazioa, eta, distantziakidetasuna suertatzen bada, handienena.

d) *Hizkuntza.* Ekoizpena jatorriz euskarazkoa bada, 15 puntu emango dira.

2. Epaimahai kalifikatzaileak lehen adierazi diren irizpideekin bat ebaluatuko ditu proiektuak, eta merezi duten erakundeei puntuazio altuenak emango zaizkie, baldin eta aurkeztutako dokumentazioaren bidez hala egiaztatzen badute, eta, puntuaziook oinarri hartuta, zuzeneko proportzioan emango zaie puntuazioa aurkeztutako gainera-ko proiektuei.



Epaimahai kalifikatzaileak gutxieneko puntuazioa finkatuko du, eta, hortik beherako puntuazioa lortuz gero, ezin izango da dirulaguntza foralik jaso.

3. Aurkeztutako proiektuaren aurrekontu araztuaren %50erainokoa izango da dirulaguntzen gehieneko zenbatekoa, eta zenbateko horrek ezin izango du ezelan ere 30.000 euroko kopurua gainditu, ez eta eskatzaileak eskatutako zenbatekoa ere.

10. oinarria. — Aholkularitza

Foru-dekretu hau dela-eta sortutako zalantza edo kontsulta guztiak argitzeko beharrezkoa den laguntza teknikoa edo aholkularitza eskainiko ditu Bizkaiko Foru Aldundiko Kultur Ekintzako Zerbitzuak. Horretarako, helbide hau dago erabilgarri webean: <http://www.bizkaia.eus/laguntzaileKulturEkintza>

11. oinarria. — Epaimahai kalifikatzailea

1. Epaimahai kalifikatzaile bat eratuko da aurkeztutako eskabideak aztertu eta ebaluatzeko. Epaimahaikideak Euskara eta Kulturako foru-diputatuak izendatuko ditu, foru-agindu bidez. Izendapen horiek egiteko, Emakumeen eta Gizonen Berdintasunerako ekainaren 20ko 4/2018 Foru Arauaren 44. artikuluan ezarritakoa beteko da.

2. Epaimahai kalifikatzaileak dirulaguntzak puntuaziorik handienak lortu dituztenei emateko proposamena aurkeztuko du, betiere aurrekontuko partidari ezarritako zenbatekoa muga izanik. Epaimahaiak ebazpen-proposamena aurkeztuko dio Euskara eta Kulturako foru-diputatuari, hark behin betiko ebazpena eman dezan.

12. oinarria. — Ebazpena

1. Foru Administrazioak ematen dituen dirulaguntzen araubide juridiko orokorra arautzen duen maiatzaren 31ko 5/2005 Foru Arauaren 22.4. artikuluan xedatutakoa betez, ez da aurreikusten deialdi honetan interesdunei lehenbizi behin-behineko ebazpen-proposamena emango zaienik, behin entzunaldiaren izapidea eskaini eta gero, zeren prozeduran interesdunek ekarri dituzten egitateak, alegazioak eta frogak besterik ez baitira jaso eta kontuan hartuko.

2. Deialdia ebatzi aurretik, Kultur Ekintzako Zerbitzuak egiaztatuko du ea eskatzaileek egunean dituzten tributu-betebeharrak eta Gizarte Segurantzari dagozkionak. Egiaztapen hori egin ondoren, eskatzailearen batek betebeharrak horietako edozein ez duela betetzen ikusten bada, errekerimendua egingo zaio hamar (10) eguneko epean egoera hori erregulariza dezan, eta ohartaraziko zaio hori egiten ez badu bere eskabidean atzera egindakotzat joko dela.

3. Eskabideei buruzko ebazpena emateko eta jakinarazteko epea hiru (3) hilabetekoa izango da gehienez, eskabideak aurkezteko epea amaitzen denetik zenbatuta.

Euskara eta Kulturako foru-diputatuak emango du ebazpena, horretarako izendatutako epaimahaiaren proposamena kontuan hartuta.

Epe hori eskabideari buruzko ebazpen espresuki eman eta jakinarazi gabe igarotzen bada, eskabidea ezetsizat joko da; hala ere, geroago ebazpen espresua eman ahal izango da.

4. Deialdi hau ebazteko ematen den foru-agindua deialdi publiko honetarako eskabidea aurkeztu duten interesdunei jakinaraziko zaie; horretarako, iragarkia argitaratuko da Bizkaiko Aldizkari Ofizialean.

Bizkaiko Foru Aldundiaren egoitza elektronikoan agertzeko sistemaren bidez ere jakinaraziko zaie foru-agindua interesdunei.

Jakinarazpenean beren-beregi jasoko da ebazpenak administrazio-bidea agortzen duela eta haren aurka errekurtsio hauek aurkez ditzakeela behean interesdunak: auzkerako berraztertze-errekurtsioa, Bizkaiko Foru Aldundiko Euskara eta Kultura Saileko foru-diputatuaren aurrean hilabete (1) epean, edo administrazioarekiko auzi-errekurtsioa, bi (2) hilabete epearen barruan; epeok jakinarazpena egin eta hurrengo egunetik hasiko dira zenbatzen.

**13. oinarria. — Beste dirulaguntza batzuekiko bateragarritasuna**

1. Foru dekretu honetako dirulaguntzekin bateragarriak izango dira estatuko nahiz Europar Batasuneko zein nazioarteko erakundeetako edozein administrazioetatik edo erakunde publiko edo pribatutatik datozen, eta helburu bera duten, dirulaguntzak, laguntzak, diru-sarrerak edo baliabideak, salbu eta Bizkaiko Foru Aldundiko Euskera eta Kultura Sailak berak emandakoak.

2. Dirulaguntza emateko kontuan hartu diren baldintzetako bat aldatzen bada, eta betiere aldi berean udalerrietako, autonomia-erkidegoetako, Estatuko edo nazioarteko beste administrazio edo ente publiko batek emandako beste dirulaguntza, laguntza, diru-sarrera edo baliabideren bat lortzen bada, gerta liteke dirulaguntza emateko ebazpena aldatzea, zeren foru-dekretu honen bitartez araututako dirulaguntzen zenbatekoa, bakarrik zein beste dirulaguntza edo laguntza, diru-sarrera edo baliabide batzuekin bat eginda, inola ere ezin baita izan onuradunak egin beharreko jardueraren kostua baino handiagoa.

IV. TITULUA

DIRULAGUNTZAK KUDEATZEA ETA JUSTIFIKATZEA

14. oinarria. — Ordainketa

1. Baldin eta deialdi hau ebazteko ematen den foru-agindua Bizkaiko Aldizkari Ofizialean argitaratu eta ondorengo hamar egun baliodunak igarota onuradunak ez badio uko egiten beren-beregi eta idatziz, orduan, dirulaguntza onartu duela ulertuko da.

Deialdi honen ebazpena dela-eta onuradunen batek uko egiten badio emandako dirulaguntzari, horrek ez du berekin ekarriko ebazpenean jasota dauden eta onuradunei jakinarazi zaizkien dirulaguntzen zenbatekoak handitzea.

Dirulaguntza eman dela Bizkaiko Aldizkari Ofizialean argitaratu ondorengo hamar (10) egun baliodunak igaro eta berehala, Kultur Ekintzako Zerbitzuak dirulaguntzaren zenbatekoaren ordainketa izapidetuko du, Ogasun eta Finantzen Foru Sailean, eta, horretarako, erakunde onuradunei ez zaie inolako bermerik eskatuko.

2. Dirulaguntza ordaindu baino lehen, onuradunek tributu-betebeharrak eta Gizarte Segurantzarekikoak egunean dituztela egiaztatuko da.

Egiaztapena egin ondoren ikusten bada onuradunetako batek betebeharrak horietako edozein ez duela betetzen, errekerimendua egingo zaio hamar (10) eguneko epean egoera hori erregulariza dezan, eta ohartaraziko zaio ezen, hala egiten ez badu, emandako dirulaguntza jasotzeko eskubidea galduko duela.

15. oinarria. — Dirulaguntza onuradunaren borondatez itzultzea

1. Martxoaren 23ko 34/2010 Foru Dekretuaren 76. artikuluan ezarritakoaren arabera (dekretu horren bidez, Dirulaguntzen Erregelamendua onesten da, maiatzaren 31ko 5/2005 Foru Araua garatzen duena), onuradunak bere ekimenez itzuli ahal izango du Bizkaiko Foru Aldundiak emandako dirulaguntza, foru-erakundeak aurretik eskatu gabe.

Halakoetan, Bizkaiko Foru Aldundiak dirulaguntza benetan itzultzen den arte sortutako berandutze-interesak kalkulatuko ditu, aipatutako 76. artikuluan eta 5/2005 Foru Arauaren 34. artikuluan ezarritakoarekin bat etorrira.

2. Erakunde onuradunak ordainketa-gutun bat erabili behar du dirulaguntza forala bere ekimenez itzultzeko. Ordainketa-gutun hori Kultur Ekintzako Zerbitzuaren bulegoetan izapidetuko da, onuradunak eskaera aurkeztu eta gero. Ordainketa-gutunean honako hauek adierazi behar dira: itzuli beharreko zenbatekoa (printzipala eta berandutze-interesak), ereduaren kodea eta dirulaguntza itzultzeko arrazoia. Hori guztia Itzuli behar den dirulaguntzari erreferentzia eginez adieraziko da.

3. Dirulaguntzaren onuradunak finantza-erakunde batean ordainketa egin ondoren, ordainketaren kopia edo diru-sarreraren frogagiria bidali beharko dio Euskara eta Kultura Saileko Kultur Ekintzako Zerbitzuari.

**16. oinarria. — Justifikazioa egiteko epea eta era**

Foru-dekretu honen bitartez araututako dirulaguntzen pertsona eta erakunde onuradunek honako konpromiso hauek bete beharko dituzte:

1. 2019an dirulaguntza ematea eragin duen jarduera gauzatzea.
2. Bizkaiko Foru Aldundiaren martxoaren 23ko 34/2010 Foru Dekretuaren bidez onetsitako Dirulaguntzen Erregelamenduaren 57. artikuluekin bat etorrita, Bizkaiko Foru Aldundiko Euskara eta Kultura Sailean justifikatu behar dute proiektua egin dela, hura emateko oinarritzakoak izan ziren baldintzak bete direla eta diruz lagundutako proiektuaren zenbateko araztuaren gastua jarduerari aplikatu zaiola, horretarako agiri hauek aurkeztu beharko dira; haiek aurkezteko azken eguna 2020ko maiatzaren 4a (berau barne) izango da:

- a) Dirulaguntza ematerakoan ezarritako baldintzak bete direla justifikatzen duen jarduera-memoria, jardueren betetze-maila adierazita.

Memoria horrek zehatz-mehatz azalduko du zelan egin den dokumentalaren zabalkundea, eta adieraziko da zein sistema edo kanal erabili den zabalkundea egiteko, eta zein tokitan eta zein datatan egin den zabalkundea.

Zabalkundea egiteko egin diren jarduerak egiaztatuko dira zelan eta sinatutako kontratuen kopiaren bidez edo egindako jarduerak egiaztatzen dituzten beste agiri batzuen bidez.

- b) Egindako jardueren kostua justifikatzen duen memoria ekonomikoa, honako hauek jasoko dituena:

- 1) Proiektuari egotzitako diru-sarreraren eta gastuen egoera-orria, egoitzan dagoen ereduaren arabera.
- 2) Gastu-partida bakoitzean, dirulaguntza jaso duen jardueraren gastuen zerrenda sailkatua, egoitzan dagoen ereduaren arabera.
- 3) Aurreko idatz-zatian aipatutako zerrendan jaso diren fakturak edo merkataritzako trafiko juridikoan froga-balio baliokidea edo eraginkortasun administratiboa duten gainerako agiriak eta, hala badagokio, ordainketa egiaztatze agiriak.
- 4) Dirulaguntzen, laguntzen, diru-sarreraren edo baliabideen zerrenda zehatza, eta, hala bada, finantzaketa propioarena ere bai, baldin eta horiek finantzatu badute dirulaguntza jaso duen jarduera; xehetasun hori egoitzan dagoen ereduaren arabera egingo da partida bakoitzaren arabera.
- 5) Diruz laguntzeko gastuaren aurrekontua justifikatzeko, maiatzaren 31ko 5/2005 Foru Arauaren 29.3 artikuluan xedatutakoaren arabera, dirulaguntza foralaren onuradunak egiaztagiria aurkeztu behar ditu, gutxienez hiru hornitzaile eskaintza egiteko eskatu zaiela justifikatzeko, baldin eta administrazio-kontrataziorako araudian kontratu txikirako ezarritako zenbatekoak gainditzen badira, salbu eta kontratuaren ezagarrri bereziak direla-eta merkatuan ez badago halakorik egin dezakeen erakunde nahikorik edo gastua eskabidea aurkeztu aurretik egin bada. Aurkezten diren eskaintzen artean aukeratzeko, efizientzia- eta ekonomia-irizpideen arabera jokatu da. Hala, proposamen ekonomikorik onena aukeratu ez denean, beren-beregi justifikatu beharko da inguruabar hori, memoria baten bidez.

- c) Ekoiztako dokumentalaren kopia bat eta hura ekoizti eta zabaltzeko erabiltako materialarena. Zelan dokumentalean hala hura sustatu eta zabaltzeko materialean, erraz ikusteko eran agertu behar da jarduera horretarako Bizkaiko Foru Aldundiak dirulaguntza eman duela; horretarako, elementu instituzionalak sartuko dira material horietan, foru-dekretu honen 17. oinarriaren e) letran ezarritakoarekin bat etorrita. Laguntza eman dela jakinarazi ondoren egindako jarduerari bakarrik dagokie betebeharrak.

**17. oinarria. – Dirulaguntzaren onuradunaren beste betebeharrak**

Onuradunak betebeharrak hauek ere izango ditu:

- a) Baldin eta dirulaguntza emateko orduan kontuan hartu diren inguruabar objektibo edo subjektiboetatik edozein aldatu bada, aldaketa horren berri egoitzaren bidez ematea dirulaguntza eman dionari.
- b) Jardueraren hasiera-data eta amaiera-data egoitzaren bidez jakinaraztea dirulaguntza eman dion erakundeari; halaber, diruz lagundutako jarduera kontrolatzeko, haren jarraipena egiteko edo ikuskatzeko eginkizunak edo ahalmenak betetzen laguntzea.
- c) Euskara eta Kulturako Foru Sailari laguntzea, hala eskatzen bazaio, eta kultura-eremuko edozein informazio ematea (azterlanak, inkestak, datu estatistikoak, etab.).
- d) Euskara eta Kultura eta Ogasun eta Finantza sailek eta Herri Kontuen Euskal Epaitegiak egiaztatzeke egin dezaketen behar beste jardun onartzea.
- e) Dirulaguntza eman ondoren editatutako material guztietan eta jendaurreko agerpen guztietan, Bizkaiko Foru Aldundiaren babes agerraztea; horretarako, Bizkaiko Foru Aldundiaren irudi korporatiboan ezarritako elementuak baliatuko dira, eta logotipoaren aldamenean esaldi hau agertuko da hitzez hitz:
«Bizkaiko Foru Aldundiak babestutako ekintza / Actividad subvencionada por la Diputación Foral de Bizkaia».
Euskara hutsean garatutako proiektuetan, gainera, euskararen txantxangorriaren irudia sartu beharko da.
- f) EAEko hizkuntza ofizial biak erabiltzea dirulaguntzaren xede den jardueraren publizitatean eta zabalkundeetan, bai euskarri grafikoan bai ikus-entzunezko komunikabideetan (era guztietako iragarkiak, kartelak, liburuxkak...).
- g) Zaintzea emakumeen eta gizonen tratamendua, protagonismoa eta balorazioa baliokideak izan daitezkeen, eta berdintasuna, presentzia orekatua, dibertsitatea, erantzunkidetasuna, eta generoaren rol eta identitateen aniztasuna balio dituen irudi bat sustatzea idatzizko zein ahozko komunikazioetan, ikonografian, publizitate-ekintzetan, barruko zein kanpoko komunikazio formal eta informalean, eta proiektuari edo jarduerari lotutako edo proiektua edo jarduera egiteko sortutako materialetan.
- h) Diruz lagundutako proiektua gauzatzen den bitartean, ez erabiltzea hizkera sexistarik dokumentuetan, ikus-entzunezkoetan eta gisakoetan (idatzizkoetan zein digitaletan), eta pertsonen buruzko edozein estatistikatan datuak sexuaren arabera bereiz jasotzea, hala ezartzen baitu arlo horretan gorde behar diren printzipio nagusiak jasotzen dituen Emakumeen eta Gizonen Berdintasunerako ekainaren 20ko 4/2018 Foru Arauaren 3 artikulua.
- i) Bizkaiko Foru Aldundiko Kultura Zuzendaritza Nagusiak deitutako bilera, foro eta gainerako koordinazio-ekitaldietara joatea.
- i) Deialdi honi dagokionez, dirulaguntza foral baten erakunde onuradunek bete egin behar dituzte 5/2005 Foru Arauaren 27. artikuluan eta Dirulaguntzen Erregelamenduaren 53. artikuluan azpikontratazioaren arloa dela-eta arautzen diren betekizunak eta debekuak.
Onartutako azpikontratazioaren gehieneko ehunekoa diruz lagundutako jardueraren %90 izango da.
- k) Bizkaiko Foru Administrazioak ematen dituen dirulaguntzen araubide juridiko orokorra arautzen duen maiatzaren 31ko 5/2005 Foru Arauaren 13. artikuluan eta Bizkaiko Foru Aldundiaren martxoaren 23ko 34/2010 Foru Dekretuaren bidez onetsi den Dirulaguntzen Erregelamenduaren 54. artikuluan eta hurrengoetan ezarritako gainerakoak.

**18. oinarria. — Itzulketak**

1. Jasotako dirulaguntza eta dagozkion berandutze-interesak itzuli beharko dira, baldin eta ez badira betetzen aurreko oinarrietan, maiatzaren 31ko 5/2005 Foru Arauaren 33. artikuluan edo foru-arau hori garatzen duen erregelamenduan jasotako bete-beharretariko bat edo batzuk. Besteak beste, honelako baten bat gertatzen bada:

- a) Justifikatu beharrekoa ez justifikatzea.
- b) Emandako dirulaguntzaren helburua ez betetzea.
- c) Dirulaguntza justifikatzen ez bada edo foru-dekretu honetan ezarritakoaren arabera nahiko edo behar bezala justifikatzen ez bada, justifikatu ez den dirulaguntzaren zatia itzuli beharko da, sortutako berandutze-interesak ordainduz, Bizkaiko Foru Aldundiko Kultur Ekintza Zerbitzuak horretarako errekerimendua egin ondoren.
- d) Proiektua egiteko epea bete ez bada.
- e) Dirulaguntza horretarako eskatutako baldintzak bete gabe lortu bada.
- f) Ezarritako kontrol-jarduketak egiten ez uztea, edo horretarako oztopoak jartzea.
- g) Foru-dekretu honetan ezarritako gainerako baldintzak ez betetzea.

2. Dirulaguntza jaso duen jarduketaren kostua baino finantzaketa handiagoa jasotzen bada, laguntza itzuli egin beharko da.

19. oinarria. — Aurrekontuko partida

1. Deialdi honetako dirulaguntzak emateko 2019. urtean indarrean dagoen aurrekontu muga hau da:

Ehun mila euro (100.000,00 euro), 2019ko ekitaldiko aurrekontuko 2019/0018 gastu-proiektuko 0405 G/334104/44300 aurrekontuko partidaren kargura.

2. Eskabide guztiak ebatzi ondoren emandakoa aurrekontuetako goreneko mugara heltzen ez bada, gastu-baimenaren deuseztapena izapidetuko da sobera den zenbatekoan.

AZKEN XEDAPENAK**Azken Xedapenetako Lehenengoa. — Gaikuntza ematea**

Ahalmena ematen zaio Euskara eta Kulturako foru-diputatuari, foru-dekretu honetan xedatutakoa ondoen garatzeko beharrezkoak diren xedapen guztiak eman ditzan.

Azken Xedapenetako Bigarrena. — Indarrean jartzea

Foru-dekretu hau Bizkaiko Aldizkari Ofizialean argitaratu eta hurrengo egunetik aurrera jarriko da indarrean.

Bilbon, 2019ko maiatzaren 28an.

Euskara eta Kulturako foru diputatua,
LOREA BILBAO IBARRA

Ahaldun Nagusia,
UNAI REMENTERIA MAIZ